

МИЛЛАТИМ ҚИЗЛАРИ

(Шеър)

Миллатим қизлари — буғдойранг қизлар,
Тандирдан узилган кулчадай ширин.
Сизлар-чи, ҳеч кимга ўхшамайсизлар,
Қора кўзингизда ҳаё яширин.

Миллатим қизлари — буғдойранг қизлар,
Тизишиб турасиз — тоғ чечаклари.
Йигитлар мақтаса, уяласизлар,
Уларнинг эртанги келинчаклари.

Миллатим қизлари — буғдойранг қизлар,
Пари момоларин пардози — мерос.
Бутун оиланинг иззатисизлар,
Синчи совчиларнинг жон-дилига мос.

Миллатим қизлари — буғдойранг қизлар,
Турфа хил сатангга қилмангиз парво.
Уларнинг ҳолини биламиз бизлар,
Уларнинг тенги сиз эмассиз асло!

Миллатим қизлари, ўзбек қизлари!

2000 йил

НАҲГРУДДА БИТТА БУЛОҚ БОР

(Шеър)

Наҳгрудда битта булоқ бор,
Мангу куйлаб ётар бахтиёр.
Муҳаббатим — жоним-жаҳоним,
Сени олиб кетурман, дилдор.

Тепасида дўлана сергак,
Атрофида ўйнар капалак.
Катта шаҳар гардларин қоқиб,
Юзларингни чаюрсан малак.

Нималардир ўчирдим, ёздим,
Ёлғонлардан нақадар бездим.
Наҳгруднинг ўша булоғин
Дилга жойлаб, дунёни кездим.

То кўрганинг бу, гуллар эмас,
Манов оққан, йўқ, сувлар эмас.
Чекканга чин чечаклар тақиб,
Ҳовуч-ҳонуч ичмасанг бўлмас.

Юлдузларни кўргунг якиндан,
Армон қолмас ҳар ўтган кундан.
Тош учокда, қора чойдишда,
Чой қайнатиб берурман ундан.

Ҳает нима, умр завқи не?
Бу дунёда яшаш шавқи не?
Қалбим Гули, сен мени десанг,
Наҳргуднинг шу булоғин сев!

Наҳгрудда битта булоқ бор,
Мангу куйлаб ётар бахтиёр.
Муҳаббатим — жоним-жаҳоним,
Сени олиб кетурман, дилдор.

2000 йил

**Шоир Азим Суюннинг
“Муҳаббат ҳайратлари”
китобидан**